

## WILLIAMS, JOHN (1854 - 1921), gweinidog gyda'r Methodistiaid Calфинаidd

**Enw:** John Williams  
**Dyddiad geni:** 1854  
**Dyddiad marw:** 1921  
**Priod:** Edith Mary Williams (née Hughes)  
**Rhiant:** Jane Williams (née Rowlands)  
**Rhiant:** John Williams  
**Rhyw:** Gwryw  
**Galwedigaeth:** gweinidog gyda'r Methodistiaid Calфинаidd  
**Maes gweithgaredd:** Crefydd  
**Awdur:** John Edward Hughes

Ganwyd 24 Rhagfyr 1854 yn Cae'r-gors, Llandyfyrdog, sir Fôn. Hanoedd ei dad, John Williams, o gymdogaeth Mynydd y Garn, a'i fam, Jane Rowland, o Gemaes. Symudodd y teulu pan oedd ef yn 9 oed i Fiwmares. Yno yn 1871 aeth i'r ysgol ramadeg a gedwid gan John Evans, ac wedyn gan [Hugh Williams](#) (1843 - 1911). Dechreuodd bregethu yn 1873 ac yn 1875 aeth i Goleg y Bala o dan [Dr. Lewis Edwards](#). Yn 1878 daeth i fugeilio eglwys Brynsiencyn. Enillodd boblogrwydd yn fuan fel pregethwr a chadwodd ef hyd ei fedd. Yn 1895 symudodd i Prince's Road, Lerpwl. Yn 1899 priododd ag Edith Mary Hughes; ganwyd iddynt fab a dwy ferch. Ymddeolodd o ofal bugeiliol yn 1906 a dychwelodd i Fôn gan wneud ei gartref yn Llwyn Idris, Brynsiencyn. Bu farw 1 Tachwedd 1921, a chladdwyd ef ym mynwent Llanfaes ger Biwmares. Meddai ar bersonoliaeth hardd, llais a pharabl cryf a chroyw, iaith gyfoethog, dychymyg byw, crebwyll treiddgar, a huodledd digymar. Cydnabyddid ef fel y meist'r mwyaf ar areithyddiaeth glasurol yn y pulpud Cymreig. Bu'n llywydd cymdeithasfa'r Gogledd, 1907; llywydd y gymanfa gyffredinol, 1913; darlithydd Davies, 1921. Bu iddo ran flaenllaw yn ffurfiad y fyddin Gymreig ddechrau rhyfel 1914-8, a gwnaed ef yn gaplan mygedol iddi. Yn 1917 anrhydeddwyd ef â'r radd o D.D. gan Brifysgol Cymru. Y mae cofiant iddo gan [R.R. Hughes](#) (1929) a chyhoeddwyd dwy gyfrol o'i bregethau (1922, 1923).

### Awdur

Y Parchedig John Edward Hughes, (1879 - 1959)

### Ffynonellau

R. R. Hughes, *Y Parchedig John Williams, D.D., Brynsiencyn* (Caernarfon 1929)

gwybodaeth bersonol

### Darllen Pellach

Harri Parri, *Gwn Glân a Beibl Budr: John Williams, Brynsiencyn, a'r Rhyfel Mawr* (Caernarfon 2014)

### Dolenni Ychwanegol

VIAF: [103000750](#)

Wikidata: [Q20738121](#)

Dyddiad cyhoeddi: 1953

Hawlfraint Erthygl: <http://rightsstatements.org/page/InC/1.0/> 

Mae'r Bywgraffiadur Cymreig yn cael ei ddarparu gan Lyfrgell Genedlaethol Cymru a Chanolfan Uwchfrydiau Cymreig a Cheltaidd Prifysgol Cymru. Mae ar gael am ddim ac nid yw'n derbyn cymorth grant. Byddai cyfraniad ariannol yn ein helpu i gynnal a gwella'r wefan er mwyn i ni fedru parhau i gydnabod Cymry sydd wedi gwneud cyfraniad nodedig i fywyd yng Nghymru a thu hwnt.

Ewch i'n [tudalen codi arian](#) am ragor o wybodaeth.